



deniers, de oyes, de chapons, de gelines, de pors, de poyvre, de cyre, soit en hommes, en femmes et en toutes autres maniers, en quelconque chose que ce soit, en touz us, en touz prouz et en toute vaillance, sanz riens [à] retenir, sauf le boix que as dites deux villes appendent, et sauf la haute justice tant seulement, ouquel boix il doivent penre marrien et futaille pour la . . . . . ne doudit Pont sus Orne qu'il doivent retenir. Et dès maintenant et pour tout le temps venant avons nous mix, fait metre et mettons les diz freire [pour] aulz et pour ceulz qui cause auront d'aulz, en saisine et en possession corporelment et de fait de toutes les choses dessusdites et divisées, à tenir par aulz, avoir, lever et recevoir et en faire leur proffit et leur volentei, comme de leur propre chose tantost après les trente livrées à tournois de terre annuele et perpetuele que nous avons assigneit et assiz sur les diz lieux devancièremment par noz autres lettres audit Colignon pour cause de hommage. Et tout le droit et action, saisine et possession à nous appartenanz d'iceus lieux nous leurs mettons en main et transportons par la tradition de ces lettres sanz riens à retenir, sauf seulement la hauteur de la justice et nostre boix, comme dit est, et leur en ont fait fauteit noz maieurs et noz eschevins dez bans et dez lieux dez villes deseur dites, par nostre créant et par nostre volenteit, et aussi feront ceulz qui establiz y seront en temps venant, pour respondre as diz freires et à ceulz qui cause auront d'aulz, comme à vraiz possesseurs saisiz, tenans chatez, levans chatez et prenanz pour tout faire et pour tout penre, comme dit est. Et voulons, mandons et commandons pour nous et pour tous ceulz qui cause auront de nous dès maintenant et sanz rappel à touz noz maieurs et nos eschevins dez dites villes qui y sont et qui pour le temps y seront, et à touz ceulz qui aikes ès dites villes nous doivent et deveront et à touz ceaulz qui ledit paiage tiennent et tenront, qu'il en soient à aulz et à leur commandement doresnavant à touz jours respondent et paient, tout ainsi comme il faisoient, feroient et deveroient faire à nous meismes. Et promettons loyalment en bonne foy pour nous, pour noz hoirs et pour ceus qui cause auront de nous, à toutes ces dites convenances et à chascunne de elles selonc ce que dit est et divisé, tenir, enteriner et de point en point aemplir en la maniere que dit est, et à tenir paisible et warantir bonnement ausdiz signeur Pierre et Colignon, freires, et à ceus qui cause auront d'aux, envers touz qui à droit et à loy deveroient venir dèsorendroit et à tous jours sanz jamais aleir encontre par quelconques malice ou cautele que ce soit, ains volons et prions dès maintenant à touz signeurs terriens et souverains, quelz qu'il soient, que il en défendent et gardent doresnavant les diz freires et ceulz qui cause auront d'aulz, de tort et de force et de touz empeschemens encontre nous et encontre tous